

Evening Dogri News Bulletin

12 January. 2026.18:15 Hrs

Headlines

- नमीं दिल्ली च आयोजित विकसित भारत यंग लीडर्स डायलाग च जम्मू-कश्मीर दे 50 कोला मते नौजवान हिस्सा लै करदे ना।
- मुख्मन्त्री उमर अब्दुल्ला होरें आखेआ ऐ जे पिछले बरे दे बजट दा असरदार तरीके कन्नै इस्तेमाल कीता गेआ ऐ।
- नियंत्रण रेखा ते अंतरराष्ट्री बन्ने कन्नै लगदे इलाकें च संदिग्ध पाकिस्तान ड्रोन दिक्खे जाने मगरा सुरक्षाबलें आसेआ तपाशी अभियान रम्भ कीते गए।
- जम्मू-श्रीनगर राश्ट्री जरनैली शिड़के पर गड्डियें दी आओजाई बवस्थित ढंगै नै जारी ऐ। मुगल रोड बी गड्डिएं दी आओजाई लेई खुल्ली।
- जम्मू च सीत लैहर ते घनी धुंध कारण आम जन-जीवन प्रभावित, बडुलै आली त्रै डोआरियां घनी धुंध कारण प्रभावित होइयां।

<><><><><><>

JK Youth Leader

विकसित भारत युवा नेता संवाद च अज्ज प्रधानमंत्री नरेंद्र मोदी होर हिस्सा लै करदे ना। इस दरान 3 ज्हार थमां मते युवा जेडे मुख्मन्त्री भरै दे अलावा बाहरले मुख्मन्त्री थमां बी आए दे न, गी प्रधानमंत्री नरेंद्र मोदी हुंदे कन्नै गल्ल करने दा मौका थहोआ'रदा ऐ। इनें युवाएं च 50 थमां मते नौजोआन जम्मू-कश्मीर थमां ना। एह युवा नेता संवाद स्वामी विवेकानंद हुंदी जयंती दे मौके पर आयोजित कीता जंदा ऐ। इस दरान चुने गेदे प्रतिभागी अपनी-अपनी प्रस्तुति प्रधानमंत्री हुंदे अगे देडन। किश युवाएं अपने बचार सांझे करे होई आखेआ

<><><><><><>

CM-Budget

मुख्यमंत्री उमर अब्दुल्ला हों आखेआ जे पिछले बरे दे बजट दा असरदार तरीके कन्नै इस्तेमाल कीता गेआ ऐ।
उनें भरोसा दोआया जे इस बरे दा बजट बी पारदर्शी होगा। उनें आखेआ जे राश्ट्री युनिवर्सिटी दी थाह लोके कन्नै
सलाह-सूत्र करने मगरा तय कीती जाहग। जम्मू च लॉ युनिवर्सिटी दी मंग बारै पुच्छे गेदे सोआले दा परता दिंदे
होई मुख्यमंत्री हों आखेआ जे इस बारै अजे फैसला नेई कीता गेआ। इस मौके पर बोलदे होई मुख्यमंत्री हों
आखेआ

<><><><><><>

Suspected-Drones

सुरक्षाबले साम्बा आहले अंतरराश्ट्री बन्ने ते राजौरी ते पुंछ जिले आहली कब्जा रेखा कन्नै लगदे अगेत्रे इलाके च
संदिग्ध ड्रोन दिक्खे। आकाशवाणी जम्मू संवाददाता दी रिपोर्ट मूजब एहू ड्रोन पाकिस्तान आहली भेठा दा इत्त
भेठा आए पर किश गै चिर भारत आहली भेठा रौहने मगरा एहू वापस परतोई गए। राजौरी जिले आहली कब्जा
रेखा कन्नै लगदे इलाके च सेना नै मध्यम ते हल्की गोलीबारी कीती। राजौरी जिले दे खाबबर ते धर्मसाल ग्रांस च
साम्बा जिले दे चक बबराल ते पुंछ जिले दे मनकोट सैक्टर च drone दिक्खे गए। नौशहरा थमां इक मुकामी नै
इस बारै दस्सेआ

<><><><><><>

Lohri

उत्तर भारत दा त्यौहार लौहड़ी कल मनाया जाहग। पूरे उत्तर भारत आहला लेखा एहू त्यौहार कल जम्मू च बी
पूरे रिवायती जोशो-खरोश कन्नै मनाया जाहग। इस मौके पर लोक अग बालदे न ते मठेआइयां, गच्चक, मुंगफली
बगैरा बंडिए इक-दुए गी मुबारकबाद दिंदे न। बच्चे शैल-शैल कपडे लाइये ते छज्जा लेइये लोहड़ी बी मंगदे न।
उनेंगी लोक मठेआइयां, मुंगफली, गच्चक, रेओड़ियां ते तोहफे दिंदे न। जम्मू शैहर च इस त्योहार दी रौनक दिक्खी
जाई सकदी ऐ। लोक दुकाने परां मुंगफली, गच्चक, रेओड़ियां, अखरोट बगैरा खरीददे दिक्खे जाई सकदे न। लोहड़ी
दे बारै अपने बचार सांझा करदे होई इक कलाकार ते कार्यकर्ता रंधीर सिंह राजपुरिया हों आखेआ

<><><><><><>

NHW-Movement

जम्मू-श्रीनगर राश्ट्री जरनैली शिडक पर दौने भेइ दा गड्डिएं दी आवाजाई सुचारू ढंगै सिर जारी ऐ। आकाशवाणी संवादाता दी रिपोर्ट मूजब कुसै बी चाल्ली दा गड्डिएं दी मट्टी रफतार यां जाम दी कोई खबर नेई ऐ। प्रशासन नै आखेआ ऐ जे मौसम च बेहतरी करी शिडक पर गड्डी चलाने आहले हालात च सुधार होआ ऐ जेदे चलदे जरूरी चीजे-बस्तें दी सप्लाई बी सुचारू चला'रदी ऐ। इस दरान ऐतिहासिक मुगल रोड जेड़ी राजौरी ते पुंछ गी घाटी दे शोपियां जिले कन्नै जोड़दी ऐ ओहू बी गड्डिएं दी आओजाई लेई खुल्ली दी ऐ।



Jammu Poonch NHW

जम्मू-पुंछ राश्ट्री जरनैली शिडक कलाई इलाके कश ल्हास-पस्सियां पौने करी हर चाल्ली दी गड्डी दी आओजाई लेई बंद ही पर तकरीबन 6 घंटे तगर बंद रौहने मगरा एहू खुल्ली गई ऐ। एहू घटना अज्ज बड्डुले पेश आई जिसलै ल्हास-पस्सी ते मलबा शिडक पर आई पेआ। ट्रैफिक प्रशासन नै लोके गी शिडक पर नेई जाने दी सलाह दित्ती ही। सीमा सड़क संगठन दिआं टीमां ते होर दुई आपात सेवाएं आहले लोक शिडक गी साफ करने ते यातायात बहाल करने लेई कम्म करा'रदियां हियां। इस बारै होर जानकारी दिंदे होई एस.ओ ट्रैफिक पुंछ विनय कुमार होरें दस्सेआ



Trekking Expectation

युवा सेवाएं ते खेडें सरबंधी विभाग आसेआ रामबन थमां पत्तीटॉप तगर 5 दिनें दा ट्रैकिंग अभियान शुरू कीता गेआ ऐ। इस कार्यक्रम च अनुशासन ते टीमवर्क दे महत्व गी उजागर करने लेई खेडें दे योगदान पर जोर दित्ता गेआ ऐ। इस चाल्ली दिआं गतिविधियां, इक सेहतमंद, सक्रिय ते जिम्मेदार पीढी गी बढावा देने आस्तै महत्वपूर्ण हुं'दियां न। इस कार्यक्रम दा मकसद नौजवानें च शारीरिक तंदरुस्ती गी बढासवा देना बी ऐ। जिला रामबन दे 6 बक्ख-बक्ख जोनें दे प्रतिभागी इस अभियान च हिस्सा लै'रदे न। इस बारै होर जानकारी दिंदे होई जिला युवा सेवाएं ते खेड अधिकारी जगदीश शर्मा होरें आखेआ



Bal Vivah Mukht Bharat

किशतवाड दे डाक बंगले च बाल विवाह मुक्त भारत विशे पर मीडिया गी जागरूक करने सरबंधी इक कार्यशाला दा सरिस्ता कीता गेआ। इस कार्यक्रम दा आयोजन मीडिया कर्मियें गी बाल विवाह रोकने ते लोकें च जागरूकता पैदा करने च उंदी महत्वपूर्ण भूमिका बारै जानकार बनाने लेई कीता गेदा हा। प्रतिभागियें गी बाल-विवाह सरबंधी कनूनी प्रावधानें, निक्की उम्री च गै ब्याह दे मामलें कन्नै निब्वडने च बाल कल्याण समिति दी भूमिका ते सरबंधत अधिकारियें गी इस चाल्ली दी जानकारी देने च मीडिया दी भूमिका बारै जानकारी दिती गई। इस दरान मीडिया दे नुमाइंदें बाल विवाह मुक्त भारत अभियान गी समर्थन देने च अपना पूरा सहयोग देने दा भरोसा दोआया। इस बारै होर मती जानकारी दिंदे होई प्रोटेक्शन आफिसर तौसिफ इकबाल भट्ट होरें आखेआ



Weather

जम्मू च अज्ज बडुलै घना कोहरा छाए दा रेआ जेदे चलदे आम जन-जीवन ते यातायात पर खासा असर पेआ। आकाशवाणी जम्मू संवाददाता दी रिपोर्ट मूजब दूर तगर नजरी नेई औने करी शैहर च गड्डिणं दी आओजाई घट्ट रेई। ट्रैफिक सरबंधी प्रशासन नै लोकें गी सौहगा कीता ऐ जे ओहू रमानदारी कन्नै गड्डियां चलान की जे सारी थाहें पर दूर तगर नजरी औने च मुश्कल पेश आवा'ररदी ऐ। धुंध आहले मौसम दा असर जम्मू ब्हाई अड्डे पर बी पेआ जेदे चलदे केई सारिरियां डोआरियां चिरें चला'रदियां न। जम्मू-श्रीनगर, जम्मू-दिल्ली ते जम्मू-इंदोर बश्कार डोआरियां धुंध करी प्रभावित होइयां। आकाशवाणी समाचार कन्नै गल्ल करदे होई किश लोकें आखेआ

